



Namminersorlutik Oqartussat ingerlataanni errorsinermut qaqorsaait aammalu kingunerutit taamaallaat avatangiisinut innarliisuunngitsunik nalunaaqutsikkanik aammalu tipigissaateqanngitsunik atuilernissaat pillugu Naalackersuisut peqquneqarnissaannik Inatsisartut aalajangiiffigisassaattut siunnersuut. Tamatuma ilutigisaanik inoqutigiinnut inuiaqatigiit errorsinermut qaqorsaatinik aammalu kingunerutit avatangiisinut innarliisinnaasunik atuinerisa millisinnissaat anguniarlugu Naalackersuisut paasititsiniaanermik ingerlataqarnissaannik peqquneqassapput.

(Inatsisartunut ilaasortaq Sofia Geisler, Inuit Ataqtigiit)

(Siullermeerneqarnera)

Demokraatinut pinngortitatta erligeqisatta iluamik pinissaa pingaaruteqarluinnarpoq. Pinngortitap tunniuttagai iluaqutigalugit uumavugut. Taannannarluunniit peqqutigalugu pinngortitamik eqqiluitsumik, avatangiisinullu pitsaanernik atugassaqartitsinissaq anguniarlugu sorsunnermut siullingnornissarput pingaaruteqarpoq.

Inatsisartunut ilaasortaq Sofia Geisler ilumoorluinnarpoq kingunerutit atuneq pisariaqanngituunera siunnersuutimini saqqummiummagu. Aamma ilumoorpoq errorsinermut qaqorsaatinik tipigissaatilinnik avatangiisinullu innarliisinnaasunik akulinnik atuneq pisariaqanngimmat. Nioqqutissiat taamaattut tamatta atussaartariaqaraluarpagut.

Demokraatit taanna pissutigalugu isumaqarput errorsinermut qaqorsaatinik aammalu kingunerutit eqqortunik atuinissaq, minnerunngitsiumillu sooq pillugu paasititsiniaanermik ingerlataqarnissaq isumatsialaasoq.

Naalackersuisut aamma silatusaartumik allunnguutissatut siunnersuuteqarsimasut paasivarput. Siunnersuutit suliarineqarnerani kissaatigissavarput Eqqissisimatitsinermut Avatangiisinullu Ataatsimiititaliap siunnersuutit nalilersorluassagaat, taassumalu kingorna qanoq iliorutta pitsaanerpaamik angusaqarsinnaanersugut innersuussutigalugu.

Taamatut oqaaseqarluta siunnersuut Eqqissisimatitsinermut Avatangiisinullu Ataatsimiititaliamut suliarineqarnissaanut innersuupparput.